



**SURAT PEKELILING PERKHIDMATAN NEGERI  
BILANGAN 3 TAHUN 2024**

**PEMBERIAN BANTUAN KHAS KEWANGAN AIDILFITRI TAHUN  
2024 KEPADA ANGGOTA PERKHIDMATAN AWAM NEGERI  
DI BAWAH PENTADBIRAN KERAJAAN NEGERI PULAU PINANG**

**TUJUAN**

1. Surat Pekeliling Perkhidmatan Negeri ini adalah untuk memaklumkan keputusan Kerajaan Negeri Pulau Pinang berhubung pemberian Bantuan Khas Kewangan Aidilfitri (BKKA) Tahun 2024 kepada Anggota Perkhidmatan Awam Negeri, Penyelia dan Guru Kelas Asas Fardhu Ain (KAFA), Guru Sekolah Rendah Agama Rakyat (SRAR), Guru Sekolah Menengah Agama Rakyat (SMAR), kakitangan SRAR, SMAR dan Sekolah Agama Bantuan Kerajaan (SABK), Guru dan Kakitangan Sekolah Persendirian Cina, Guru Tahfiz, Guru Pondok dan Guru Tadika Islam (TADIS) Negeri Pulau Pinang di bawah Pentadbiran Kerajaan Negeri Pulau Pinang.

**LATAR BELAKANG**

2. Sebagai penghargaan Kerajaan Negeri terhadap sumbangan Anggota Perkhidmatan Awam Negeri di Pentadbiran Kerajaan Negeri Pulau Pinang, Kerajaan Negeri telah bersetuju untuk memberikan BKKA Tahun 2024 sebanyak  $\frac{1}{2}$  bulan gaji atau minimum RM1,200.00.

3. Pemberian BKKA ini turut dipanjangkan kepada Penyelia dan Guru KAFA, Guru SRAR, Guru SMAR, Kakitangan SRAR, SMAR dan SABK, Guru dan Kakitangan Sekolah Persendirian Cina, Guru Tahfiz, Guru Pondok dan Guru TADIS Negeri Pulau Pinang sebanyak RM300.00.

### **PELAKSANAAN**

4. Pemberian BKKA ini diberi kepada semua pegawai Perkhidmatan Awam Negeri yang masih berkhidmat pada **15 Mac 2024** sebanyak ½ bulan gaji atau minimum RM1,200.00.

### **PEGAWAI YANG LAYAK**

5. Pegawai yang layak menerima adalah tertakluk kepada perenggan 4, dan pematuhan kepada perkara- perkara seperti berikut :

- 5.1 pegawai lantikan tetap, sementara, *Contract of Service* (COS), *Contract for Service* (CFS) dan Pekerja Sambilan Harian (PSH)/Personel MySTEP;
- 5.2 pegawai yang bercuti bergaji penuh;
- 5.3 pegawai yang bercuti separuh gaji;
- 5.4 pegawai yang bercuti tanpa gaji;
- 5.5 pegawai yang dipinjamkan termasuk ke agensi yang diasingkan pengurusan saraannya. BKKA ini akan dibayar oleh agensi yang menerima peminjaman pegawai;

- 5.6 pegawai pinjaman yang kembali ke agensi asal/pembekal, BKKA ini akan dibayar oleh agensi asal/ pembekal;
- 5.7 pegawai COS, CFS, sementara dan PSH/Personel MySTEP yang tamat tempoh kontrak dan telah dilantik semula, dan masih berkhidmat pada **15 Mac 2024**;
- 5.8 pegawai yang bertukar masuk ke Perkhidmatan Awam Negeri Pulau Pinang dari Perkhidmatan Awam Negeri lain atau Perkhidmatan Awam Persekutuan sebelum atau pada **15 Mac 2024**; dan
- 5.9 pegawai yang meninggal dunia pada **15 Mac 2024**.

## **PEGAWAI YANG TIDAK LAYAK**

6. Pegawai yang tidak layak dibayar BKKA adalah seperti berikut :
  - 6.1 pegawai yang tidak lagi berkhidmat dengan Perkhidmatan Awam Negeri pada **15 Mac 2024**;
  - 6.2 pegawai yang dikenakan hukuman tatatertib dalam tempoh **19 Disember 2023 hingga 15 Mac 2024**;
  - 6.3 pegawai yang peletakan jawatannya berkuat kuasa pada **15 Mac 2024**; dan
  - 6.4 pegawai yang tidak hadir bertugas tanpa kebenaran Ketua Jabatan mengikut Perintah Am (P.A) 14A(a) Bab C yang melebihi **3 hari** dalam tempoh **19 Disember 2023 hingga 15 Mac 2024**.

## **PEGAWAI YANG DITANGGUHKAN BANTUAN KHAS KEWANGAN AIDILFITRI TAHUN 2024**

7. Pegawai yang ditahan kerja, digantung kerja atau surat pertuduhan telah dikeluarkan oleh Pihak Berkuasa Tatatertib ditangguhkan pemberian BKKA. Pegawai hanya layak dibayar BKKA sekiranya Pihak Berkuasa Tatatertib mendapati pegawai tersebut tidak bersalah.

### **TARIKH PEMBAYARAN**

8. Pembayaran BKKA akan dilaksanakan pada **15 Mac 2024**.

### **TARIKH RAYUAN**

9. Tarikh akhir bagi sebarang permohonan atau rayuan BKKA adalah sebelum atau selewat-lewatnya pada **22 Mac 2024** dan perlu dikemukakan kepada YB Setiausaha Kerajaan Negeri dengan perakuan melalui Ketua Jabatan.

### **TANGGUNGJAWAB PEMBAYARAN**

10. Pembayaran BKKA ini adalah menjadi tanggungan jabatan di mana pegawai berkhidmat pada tarikh pembayaran atau jabatan terakhir pegawai berkhidmat.

### **TARIKH KUAT KUASA**

11. Surat pekeliling perkhidmatan ini berkuat kuasa mulai dari tarikh ia dikeluarkan.

## **PEMAKAIAN**

12. Tertakluk kepada penerimaannya, Surat Pekeliling Perkhidmatan Negeri ini juga dipanjangkan kepada semua Pihak Berkuasa Tempatan (PBT) dan Badan Berkanun Negeri (BBN) termasuk Ahli Majlis PBT di Pulau Pinang.

**"MALAYSIA MADANI"**  
**"BERKHIDMAT UNTUK NEGARA"**  
**"CEKAP, AKAUNTABILITI, TELUS"**



**(DATO' HAJI ROSLI BIN ISA)**

**Setiausaha Kerajaan Negeri**

**/ Mac 2024**

**Semua Ketua Bahagian PSUKPP**

**Semua Ketua Jabatan Negeri**

**Semua Pihak Berkuasa Berkanun**

**Semua Pihak Berkuasa Tempatan**